

同州府志

第三函
函六冊

同州府志卷二十七

良吏傳上

水濁魚喁絃急琴摧誰蠲衆瘼廉能之歸鄭僑楚敖
千古一見條宜著庸樹鵠茲傳述名宦傳第一

漢

邢子昂河間人魏太祖時爲行唐令勸民農桑風化大行
遷左馮翊時人稱曰德行堂堂邢子昂

孔僖字仲和魯人光和二年拜臨晉令崔駰以家林筮之
謂爲不吉止僖曰子盍辭乎僖曰學不爲人仕不擇官吉

凶由已而由卜乎在縣三年卒

王阜字代 爲重泉令吏民向化鸞止學館阜使授官椽
公沙疊爲張雅樂擊磬鸞乃舉足垂翅應聲而舞

任頽永和間郃陽令時東西羌寇隴西掠關中殺長吏頽
追擊戰死

曹全字景完敦煌人建寧二年舉孝廉除郎中遷右扶風
槐里令遭同產弟憂棄官光和六年復舉孝廉拜郃陽令
存慰高年撫育鰥寡以家錢糴米粟賜瘠育大女桃斐等
合七首藥神明膏與有疾者咸瘳百姓襁負及者如雲載

治牆屋市肆列陳風雨時節歲獲豐年縣前遭白茆谷水
災興造城郭開南寺門承望華嶽鄉明而治廣聽事官舍
廷曹廊閣費不出民役不干時門下掾王敞等刊石紀功
魏

鄭渾字文公河南開封人遷左馮翊時梁興等略吏民五
千餘家爲寇鈔諸縣不能禦皆恐懼寄治郡下議者以爲
當移就險渾曰興等被散竄在山阻今當廣開降路宣諭
恩信而保險自守此示弱也乃聚吏民治城郭爲守禦之
備發民逐賊獲十以七賞百姓大悅皆願捕賊多得婦女

財物賊之失妻子者皆還求降渾責其得他婦女然後還其妻子於是轉相寇盜黨與離散出者相繼乃使諸縣長吏各還本治以安集之興等懼將餘衆聚鄜城渾率吏民前登斬興及其支黨前後歸附四千餘家由是山賊皆平民安產業

晉

歐陽建字堅石世爲冀方右族雅有思理才藻美贍爲朝邑尹爲政剛果時人爲之語曰渤海赫赫歐陽堅石厯馮翊太守甚得時譽

范晔字彥長南陽順陽人爲司徒左長史轉馮翊太守甚有政能善於撫綏百姓悅之

索綝字巨秀敦煌人舉秀才除好畤令轉長安令在官有稱遷新平太守時劉聰將蘇鐵劉五斗等劫掠三輔除綝安西將軍馮翊太守綝有威恩華戎嚮服賊不敢犯及懷帝蒙塵長安又陷綝與雍州刺史賈疋扶風太守梁綜等糾合義衆頻破賊黨修復舊館遷定宗廟進救新平小大百戰秦王卽位是爲愍帝綝遷京兆尹

北魏

席法友安定人初仕齊後歸魏以功遷華州刺史恬靜自
安不競世利在州以廉和著稱

薛辯字允白河東汾陰人魏東雍州刺史明元深加器重
曰朕委卿西蕃志在關右卿宜克終良算與朕爲長安主
人辦務農教戰恒以數千之衆摧抗赫連氏帝甚褒獎之
伊穉代人眞君初爲東雍州刺史恩化大行百姓思之

元熒安定王休子世宗初除華州刺史表曰謹惟州治李
澗堡雖是少梁舊地晉芮錫壤然胡夷內附遂爲戎落城
非舊邑先代之名爰自國初護羌小戍及改鎮立郡依岳

立州因藉倉府未刊名實竊見馮翊古城羌魏兩民之交
許洛水陸之際先漢之左輔皇魏之右翼形勝名都實惟
西蕃奧府今州之所在豈惟非舊至乃居岡飲澗井谷穢
雜升降劬勞往還數里謄謫明昏有虧禮教未若馮翊面
華渭包原澤井淺池平樵牧饒廣採材華陰陸運七十伐
木龍門順流而下陪削舊雉功省力易人各爲已不以爲
勞昔宋民無井穿井而忻得人況合城無水得水而不家
慶竊聞前政刺史非是無意或值兵舉或遇年災緣此契
濶稽延至此去歲已熟秋方大登四境宴安京師無事丁

不十錢之費人無八旬之勤損輕益重乞垂昭鑒遂詔曰
一勞永逸便可聽移復除幽州刺史

李叔彪渤海蓀人除假節行華州事爲吏民所稱

奚康生河南洛陽人出爲平西將軍華州刺史頗有聲績
唐永北海平壽人耿介有將帥才大統元年拜東雍州刺
史尋加衛將軍卒贈司空

高幹渤海蓀人字千奴白水太守以廉平著稱

郭神寶京槃人魏孝武時除洛州刺史孝武西入授行臺
尙書潼關大都督齊神武遣大都督竇泰襲宏農時神寶

衆少戰敗乃奔洛州與刺史泉企城守力窮城陷竟爲東
魏將高敖曹所擒謂敖曹曰天子之臣乃爲賊所執敖曹
素聞其名義不殺送并州見神武言色不屈見害

薛長瑜河東汾陰人天平中爲洛州刺史擊賊潼關沒於
陳

王德字天恩代武川人孝武西遷行東雍州事在州未幾
百姓懷之大統元年遷北雍州刺史

楊儉字景則華陰人孝武初除北雍州刺史政尙寬惠夷
夏安之大統七年爲都督東雍華二州諸軍事華州刺史

卒於家

宇文導字菩薩少雄豪有仁惠文帝東征畱導爲華州刺史及趙青雀子伏德慕容思慶等作亂導自華州率所部兵擊之擒伏德斬思慶進屯渭橋會太祖軍進爵章武郡公太祖率諸將輔魏太子東征復以導爲大都督華東雍二州諸軍事行華州刺史導治兵訓卒得定捍之方

宇文深字奴干性鯁正大統中厯東雍州別駕使持節大都督東雍州刺史爲政嚴明示民以信抑挫豪右吏民懷之

王羆字熊羆京兆霸城人性剛直木彊在官清廉嫉惡勵精公事普泰間宇文泰將圖高歡令羆率甲士一萬鎮華州及孝武西遷進車騎大將軍儀同三司除華州刺史大統元年高歡陷潼關人懷危懼羆勵將士以安衆心歡退拜驃騎大將軍加侍中開府常修城未畢工東魏遣軌司馬子如從蒲津宵濟襲羆軍比曉賊已乘梯入城羆尙卧聞閣外洶洶聲遽起袒跣持白梃大呼而出敵見驚走逐至東門左右稍集合戰破之軌遂遁走泰聞而壯之時關中大饑徵民間粟供軍需匿者遞相告民多驚散唯羆誠

信素孚得粟不少諸州而無怨讟沙苑之役高歡士馬甚盛泰以州當衝要遣使勞羆令加守備羆曰老羆當道卧狙子安得過及高歡至城下令羆早降大呼曰此城是王羆冢生死在此欲死者來歡不敢攻乃涉雒軍許原西後移鎮河東進爵扶風郡公

王彥河津人文中子通之曾祖也爲同州刺史著政小論八篇言王霸之業通稱內難而能正其志云

宋稚字季預敦煌人景明二年拜白水縣令在縣十一年頗得民和

北周

豆盧寧字永安昌黎徒河人大統中拜北華州刺史在州以廉平著稱加散騎常侍從於謹破稽胡帥劉平伏於上郡武成初爲同州刺史復督諸軍討稽胡郝阿保劉柔德等破之軍還遷大司寇保定四年授岐州刺史屬大兵東討興疾從軍五年薨於同州

達奚武字成興代人保定三年爲同州刺史時屬天旱高祖敕武祀華嶽廟舊在山下常所禱祈武謂僚屬曰吾備位三公不能燮理陰陽使盛農之月久絕甘雨忝寄旣

重憂責實深必須登峰展誠尋其靈輿嶽至高峻人跡罕
通武年踰六十數人攀援得上於是稽首祈請陳百姓懇
誠晚不得還卽於嶽上藉草而宿夢見一白衣人來執武
手曰快辛苦甚相嘉尙武驚覺益用祇肅俄而澍雨遠近
霑洽高祖聞之璽書勞武子震字猛畧武平初除華州刺
史導民訓俗頗有治方秩滿還朝爲百姓所戀

劉亮中山人周文時東雍州刺史爲政清靜百姓安之

薛善字仲良汾陰人太祖欲廣置屯田以供軍費除司農
少卿領同州夏陽二十七屯監又於夏陽諸山置鐵冶復

令善爲治監每月役八千人營造軍器善親自督課兼加
慰撫甲兵精利而皆忘其勞苦焉論功賜爵龍門縣子
韓果字阿六拔武川人天和初授華州刺史爲政寬簡吏
人稱之

楊纂廣寧人慷慨有志略天和六年進柱國大將軍轉華
州刺史纂性質樸莅職但推誠信吏人懷之

鄭偉字子直滎陽開封人天和六年轉華州刺史莅職以
威猛爲政吏人莫敢犯禁盜賊休止

陽猛正光中轉華山郡守移鎮潼關頗有聲績

隋

蔡王智積高祖弟整之子授同州刺史以修謹聞聽政之暇端坐讀書門無私謁有侍讀公孫尙儀山東儒士府佐楊君英蕭德言並有文學時延於坐所設唯果餅酒纔三酌其簡靜如此開皇二十年徵還京第

柳機河東解人周宣帝時拜華州刺史高祖踐阼徵爲納言復出爲華州刺史前後作牧俱稱寬惠

崔宏度字摩阿衍博陵安平人開皇初拜華州刺史御下嚴急讐氣令行禁止盜賊屏跡